

तिमोथीलाई

पावलए छीनीकाव परींद ओयो चिथी

आव चिथी तिमोथीलाई पावलए छीनी परींद ओयो ज़। पावल भ्यालखानाल उलिज़्याक (२ तिमोथी १:१६; २:६) रोमीराए याघेप्पाराए कुइनी सिन्या बेला हुनाद उलिज़्याव (४:६-८)। है जैद पावलए तिमोथीलाई डादाडाव ओदैव येनत ओसार् हाइदचाद, धो सहिउ दुखर उहुदी ब (१:८; २:३) परमेस्वरए ओपाँलाई पाथस नैद (१:१४) चाव था सथैन्या (४:२,५) ओजैव सरैःसिउ लिज़्या।

१ डा पावल, येसु ख्रीसए ओक्याँत अजम्बरी जुनीलाव याका लिज़्या है लिन्या पाँत ओसाची डालिज़्या। नो येनत ओल परमेस्वरए ज़ खतैद नैनाव। २ डा डाल्योनी आव चिथी नँ डायुँलाव डाज़ा तिमोथीलाई परींद डाईज़्या। परमेस्वर गेबाबु सोनो गेप्रभु येसु ख्रीसनी निल्योनी नियुँ ओयाल्क, नियुँ ओगराँक, नँ नयुँ ब होलाँ जैद उईनिक।

डादाकिन नदोहुव मिताव ज़ दोनायो

३ डासाखा पुर्खाराकिन ज़ ओसेवा यादोहुज़्याव परमेस्वरलाई डा ब छेंव युँस ज़ ओसेवा दाद नँलाई चेतैद

नजुँनी लाकनी रील परमेस्वरलाई पोंखारिद धन्याबाद चरैःव ज़ डानैज़्या। ४ गिन्भाःसिज़्याकाव नरास्ज्याव पिलर डाचेतैक नँस खर्क दैसिद गिनयुँ होलाँ गिन्जैके लिद डायुँ थू दोज़्याव। ५ हाः बेलाक परमेस्वरए ओपाँत साचो युँस ज़ नलिज़्याव डाचेतैज़्या। निताव युँ डादाकिन नबुज्यु लोइसस ब उलिज़्याव, नआमा युनिसस ब उलिज़्याव। आःपै नँस मनी लिज़्याखेहो लिद डायुँ हुबो ज़ लिज़्या। ६ है जैद डा नँलाई तोबो पाँत डासम्जैनिज़्या, नो नक्याँत डाकुइ नैद असिक डाईज़्याकाव परमेस्वरनिकाव नदैव

बरदानलाई पाथस जोगोइद नैयो। ७परमेस्वरए गेलाई छेःन्यायुं ओयासिउ माःक, नोए ओयासिउ युं ते घ्योःव, अर्काए ल्योदा यालो, तहस लिन्या लिज्या। ८है जैद गेप्रभुए ओसाची यान्यात नलाज ताहुक। परमेस्वरए ओयेनत कैतल लिज्यावए डाजूनी ब नलाज ताहुक। बुरू परमेस्वरए चाव ओथा सथैन्यात ओल ओसक्तीनी ज़ दुखर डासहिज्याव मिताव नँ ब सहियो। ९ओल परमेस्वरए ज़ गेलाई अजम्बरी जुनी दैन्या असिक याद उमिनत छैव येन दान्या खतैसिक्यो। नो भरी गेनी गेदोव येननी ओयासिउ ते माःक, ओल उयुं गराँद उयुं स्यानी ज़ ओयासिउ ची। है जैद आव नाम नम ओमाजैद डादाकिन ज़ येसु खीसनी गेलाई यान्या थःरैद ओनैज्याव। १०नो असिक आज्याल गेलाई बाँचैज्याव येसु खीस उहुवनी ज़ गेल्योदा परमेस्वरए उयुं ओयालो छर्लङ्ग ज़ रैःज्या। नोए गेजूनी सिन्याए उमिन ज़ समैदचाद खर्क ज़ मासिन्या जुनी दैन्या येम चाव थानी ज़ सतैदचासिक्यो। ११डा पावल नो चाव था सथैद मिँरालाई पैन्यात ओसाची खतैसिउ डालिज्या। १२नो येननी ज़ इताव दुखर ब दैद डानै। हैदी ब डालाज माहुइ, डायुं हुबोलाई डासरेस्ज्या। है जैद ओल उहुन्या छ्यामए जूनी ओपासल डानैव

भरी ओल ज़ पाथस नैदचान्या ले लिद डायुं हुप्द ले। १३नँ ब येसु खीसलाई नयुं हुप्द ओल्योदा नयुं थू जैद डाल्योनी नपैसिउ साचो पाँ भरी नडाक थाँसिउ मिताव ज़ नैयो। १४गेयुंलाव बास दाद नैज्याव छैव पुरूसए ओसक्तीनी नपासल नैसिउ परमेस्वरए ओपाँलाई बनै पाथस नैयो।

ओनेसिफोरसए उगुनर

१५नँ ज़ नसैज्याखेहो, एसियालाव गेसकाव लिज्यावराए डालाई प्राइँए ज़ रास्नाकेर। नोरानी फुगेलस सोनो हर्मोगेनसनी ब निल्यो। १६नो बेलाक डा भयालखानाल लिज्यावलाई रँःद ओलाज माहुद समारिज्याव ओनेसिफोरस वाज्ज ओल्यो। है जैद नोए उक्किमलावराए ल्योदा प्रभु बनै ज़ दाइनो ओताक। १७नो मिँ रोमल उहुत डालाई बनै धामास खिम्द दैनाक्यो। १८नो मिँए एफिससल डालिज्याक बनै चावस डासेवा दाद ओसघैनाज्याव नँ ब नसैज्या। है जैद गेप्रभु फरी उहुन्या छ्याम नोए ल्योदा परमेस्वरए उयुं ओयाल्क।

खीसए ओयेनत चाव सिपाई मिताव जैसिन्या

२ है जैद नँ डाजा तिमोथी, येसु खीसए उयुं नल्योदा ओयालोए

बनै थ०रिद ज़ लिनी। २परमेस्वरए उमिनतावराए याड़ाक डा नॅलाई आव येनत डाखतैनिउ बेलाक डाल्योनिकाव नथैव भरी नॅ मनी छुत नयुं हुबो मिँरालाई नो पाँर सथैद याखतैयो। नोराए मनी हितावनी ज़ छुतरालाई ब ओरापैरक। ३येसु ख्रीसए ओसेवा दान्यात चाव सिपाई मिताव जैसिद डा डासहिज्याव मिताव दुखर नॅ ब सहियो। ४फौजीलाव सिपाईए मनी कमान्दरलाई सरेंन्याए जूनी ओल ओयेन दान्यादा लन्था ज़ मादोव। ५हो मिताव ज़ खेलल दाँजिसिज्याव मिँए मनी रैःसिउ परिन्थानी ओरैःसिकिन वाज़ बाजी दैन्याकाव ताज़्या। ६सोनो, एँःलाव येन दोज़्यावरानी जोए कोसै धामा दोज़्याव, होए ज़ प्राइँरानी ड़ाताव सै दैज़्याव। ७आव है डादींज़्याव पाँरालाई नयुँल खामिद य़ाका नदोकिन परमेस्वरए नॅलाई प्राइँल ज़ तीधुन्या जैन्या ले।

८डा डारासथैज़्याव दाऊद राजाए ओथोलाव, सिउनी सोव येसु ख्रीसलाई नयुँल नैयो। ९नो चाव था सथैन्यानी ज़ दुखर दैद डानै। अपराधी मिताव साँगलए किद भयालखानाल थुनैद नैनार। हैदी ब परमेस्वरए ओपाँलाई ते सुर्द मानैधुर। १०है जैद परमेस्वरए ओराछाँतिउराए येसु

ख्रीसनिकाव ज़गै मगैवलाव अजम्बरी जुनी यादैकिन ताखेहो लिद नोराए जूनी प्राइँ दुखर डासहिज्या। ११आव बनै थ०रिउ युँ हुबो पाँ ज़ लिज्या —

ख्रीसस गेसिउ मिताव गेताकिन,
साःरो जुनील मनी
ओलस ज़ तान्या गेले।

१२उमिनताव दुखर गेसहिकिन,
ओलस ज़ राज्या चलैन्थ्या गेले।
ओललाई, 'गेमासरेसे'
है गेदोकिन,
ओल मनी 'डामासरेस्चिए'
है दान्या ले।

१३खाली गे ओसतत गेमालिदी ब
ओल ते गेसतत ज़ लिज्या।
ओल ते असत
खर्क ज़ मादोव।

परमेस्वरए ओयेनत स्याबास दैन्या

१४आव पाँ भरी प्राइँलाई ज़ सम्जैव ताके, सोनो 'अन्नाकलाव पाँत ताखर्ले-सिच्यो' लिद परमेस्वरए उमिननी अर्थैव ताके। निताव पाँ थैज़्यावर बलेस्ज़्यार। १५नॅ परमेस्वरए साचो ओपाँलाई चावस पलास्द यापैयो। किताव बाहोज्याए ओघरपतीए ओयेन चावस ओदोकिन ओलाज हुन्या माले, हिताव ज़ नॅ मनी परमेस्वरए उयुँलाव मिताव ताद, ओयेनत कलँ ल्यो

ताके। १६ओअर्थ माल्यो अन्नाकलाव पाँकिन तँड ल्यो ताके। निताव पाँए परमेस्वरकिन भन तँदा ज़ लाँव दोज़्याव। १७बिसिउ घाइए स्यालाई ओक्वाज़्याव मिताव नो पाँए ब भन ज़ माचाव जैज़्याव। निताव माचाहिउ पाँ ससैज़्यावरानी हुमेनियस स़ोनो फिलेतसनी ब लिज़्यानी। १८नोनी साचो पाँकिन तँदा बाद, 'परमेस्वरए उमीरालाई सिउनी सोचोइन्या ओयेन ते ताधुके,' है दाद ख्वारालाई यायुँ काता माँ:ती जैद याराएज़्यार। १९हैदी ब परमेस्वरए ओपाँ ते घेप्पा गजलाव लुँ स्यासो थंरिउ लिज़्या। नो लुँत इताव नेब्लो पाँ ब आनी हुनी सर्सिउ लिज़्या — 'परमेस्वरए उमीरालाई यासरेस्ज़्याव,' स़ोनो, 'परमेस्वरए उमिन हाइज़्याव भरी पापल भा:ज़्याव पाँनी अछतड उलिरक।'

२०यो:व मिँए उक्किमल सुन चाँदीए जार वाज़ मालेर। गमे जार, सीए जार ब लिज़्यार। ख्वार बनै याए: ल्योर लिज़्यार, ख्वार याए: माल्योर मनी लिज़्यार। २१है जैद जोए इताव माचाहिउ पाँरानी छेसिद उलिकिन नो मिँ चाव ओयेन भरित ओसाहुए ओड़ाक बनै ओमान ल्यो, उगुन ल्यो चोखो जा स्यासो ज़ तान्या ले।

परमेस्वरए ओपाँ पैज़्याव ओबानी

२२भर्जाकावरालाई माचावल पारै-ज़्याव भरिनी नँ ते जोगोइसिद लिनी। बुरू छैव युँनी परमेस्वरए उमिन-तावरास नँ परमेस्वरए ओसतत लिद, ओपाँत नयुँ सुहुपुद, नै मेंए ल्योदा नयुँ थू जैद, प्राइँस खैन्यादा कलँ ल्यो ताके। २३अन्नाकलाव ओर्घाताव पाँर ताथैयो। ननी ते इंसिन्या वाज़ ताज़्या। २४प्रभुए ओयेन दाज़्याव मिँ ते इताव इंसिन्या स्यासो ताताक। बुरू नो मिँ ओदया ल्यो, परमेस्वरए ओपाँ पैधुन्या, माचाव पाँलाई गाल्द नैन्या, २५स़ोनो परमेस्वरए ओपाँकिन तँदाडावरालाई तहस सुधारैन्या ब ओताक। कसा परमेस्वरए यायुँ फर्केदद्याद साचो पाँत मारारैव। २६इतावनी नोर याचेतर फर्किद सैतानए ओजालनी कसा पुलुस्द माहुर। नल सैतानए ओयेन दान्याए जूँनी क्यो:द यानैव।

छीनी हुन्या पाँर

३ आव ब सैद नैयो, छीनीकाव बेलाक धो सहिउ दुखर हुरिज़्या। २नो बेलाक मिँर यालाई तान्या वाज़ चेतैरिज़्यार, धनए लोभत



बारिज़्यार, सघ्योःसिद पाँरिज़्यार, स०द छुतरालाई याराथल्लिज़्यार, याबाबु याआमाए पाँ ब दान्या मालेर, गुन ब चेतेन्या मालेर, यायुंणी कुबातैँ वाज़ हुरिज़्या, ३सुलाई ज़ मया दान्या मालेर, सुरास ब खैन्या मालेर, अर्काए उछींणी पाँद यामिन बले-द याराएरिज़्यार, माचाव येनत यायुँ नैधुन्या मालेर, याछचास ल्योर तारिज़्यार, चाव पाँलाई सोरिज़्यार, ४छुतरालाई धोका याराएरिज़्यार, याडादा याछींदा माभाल्सिद माचावदा ज़ यासा भाःरिज़्यार, स०रिज़्यार, परमेस्वरकिन भन बॉन्यादा यायुँ थू जैरिज़्यार। ५पाखाड ते धर्म यामानि- ज़्याव मिताव ते जैसिज़्यार, खाली यायुँल ते नो पाँए ओसक्ती भरी वैज़्यार। निताव मिँरानी नँ अछतड लिनी।

६नितावराए फ़िम फ़िमक दुलिद पापल गदिद लिज़्याव यार्ती माल्यो मेंमारालाई याल्योदा याराजैज़्यार। नो मेंमार माचाव याचेतैज़्याव भरिदा यायुँ थू जैद याकिला माल्यो मितावर लिज़्यार। ७कोभाराए पाँर थैद होत ज़ बाद साचो पाँलाई खर्क ज़ माथ-रैधुर। ८यान्नेस सोनो याम्ब्रेसनी मोसाकिन तँदा निजैसिज़्याव मिताव आव छुत

पाँ पैज़्यावर ब साचो पाँकिन तँदा लिज़्यार। नोर याबुद्धी बलेस्द परमेस्वरए ओपाँनी काम मालागिउ खेर बावर ताद लेर। ९खाली आवराए यापाँ ते माफाबिए। डादाडाव यान्नेस सोनो याम्ब्रेसनी निपाँ ओमाथ०रिउ मिताव आवराए यापाँ ब प्राइँए ज़ ओअर्थ माल्यो थ-रैन्या लेर।

नसरेस्ज़्याव साचो पाँत ज़ लिनी

१०नँ ते डा डापैनिउ येमदा ज़ नबा- ज़्या। डा डादोज़्यावनी नँ ब नदोज़्या, डाताकिज़्यावदा नँ ब नताकिज़्या। डा किताव डायुँ डासुहुप़्ज्याव, हिताव ज़ नँ नयुँ ब नसुहुप़्ज्या। डा डासहिज़्याव मिताव नँ ब नसहिज़्या। छुतलाई मया दाद डादोज़्याव मिताव नँ ब नदोज़्या। डा डाथ०रिज़्याव मिताव नँ ब नथ०रिज़्या। ११डाखिरी पसिद यायाँज्याव दुखर डासहिज़्याव मिताव नँ ब नसहिज़्या। ओहो! एन्तिओखिया, आइकोनियन सोनो लुस्त्राल किताव किताव दुखर डादैके। हितावरानी ब प्रभुए जोगोइ- नाक्यो। १२साचो ज़ लिज़्या, येसु ख्रीसए ओसतत लिद ओयेमल बाज़्यावरालाई जुनी ब खिरी ते पसिज़्या ज़। १३खाली धुतैज़्याव



सोनो माचाव मिँर भन ज़ बलेस्नान्या लेर। या छुतरालाई याराधुतैज़्यार, यालाई ब छुतराए याराधुतैज़्यार।

१४ नँ भन्या नपैसिउ पाँलाई साचो थःरैद, 'युँ हुबो मिँए ल्योनी ज़ डापैसिके' लिद मामेंःद होत ज़ लिनी। १५ सोनो 'धर्मसास्त्रलाव छैव पाँ ज़िम्ज़ाकिन ज़ डादैके' लिद य़ाका दोयो। नो पाँए युँ हुपुदकाव येसु ख्रीसनी ताज़्याव अजम्बरी जुनी दैन्या येम थःरैव परीव दोज़्याव। १६ धर्मसास्त्रलाव पाँ भरी परमेस्वरए ओयाःनी हुव पाँ ज़। नो पाँ परमेस्वरए ओयेम पैन्यात, याखत ल्योरालाई सम्जैन्यात, मादाँवलाई सदाँन्यात, धर्मलाव येन सिऊन्यात बनै ओचाहित ल्यो लिज़्या। १७ ननी ज़ परमेस्वरए उमींलाई चाव येन भरिल उहिल हाइन्यात प्राईं सरजाम जोरैसिउ लिज़्या।

आव येन नँ ज़ दोव ताके

डा नँलाई परमेस्वरए ओड़ाक सोनो सिउ मासिउराए यान्याय फाल्द ओराज्या चलैहुरिज़्याव येसु ख्रीसए ओड़ाक है डादींज्या — २ परमेस्वरए ओपाँ सथैन्यात जो बेलाक तादी ब भाःसिद ज़ लिनी। नरापैक नर्च्या मासैःद नोरालाई सिडार्द तादी ब, सम्जैद तादी ब,

चाव येमदा ज़ याघलैयो। ३ छींनी मिँराए साचो पाँलाई मासहिधुन्या बेला ब हुरिज़्या। नोराए यामन लागिउ पाँ सथैन्या मिँर जोतोरो ज़ रैद होराए यापाँ वाज़ थैन्या लहर दान्या लेर। ४ है जैद साचो पाँदा यार्ना सूइद, माचाहिउ घर्ती बिन्ती मिताव पाँरादा यार्युँ जैन्या लेर। ५ नँ भन्या प्राईंल नतहस लिद, दुख सहिद, चाव था फीजैद, नखतिउ येनलाई सयोःके।

६ डा ते आव संसारनी बान्या बेला हुके। डा डापोहोन भाःदचान्या सुरू ज़ ताद ले। ७ सिपाई मिताव लरिद डार्सा भरी भाःद, दाँजिसिन्या भरी खेम्द, डार्युँ हुबोलाई जोगोइद डानैके। ८ धर्मीराए यादैज़्याव इनाम डा डार्युँ ब स्वर्गत नैसिउ लिज़्या। मिँरालाई ओराफाल्दिज़्याव छचाम न्यायस फाल्ज़्याव गेप्रभुए ज़ डालाई यारिज़्याव। खाली डालाई वाज़ माःक, 'ख्रीस खर्क हुके' लिद यार्युँ थू जैद कींद नैज़्यावराए जूनी ब लिज़्या।

आदा होदा लिन्या पाँर

९ नँ डाल्योदा चाँदो हुद डास दैसिन्या धामा दोके। १० देमासए आव मानुवाताव पाँरादा उयुँ भाःद डालाई रास्द थेसलोनिकेल बाके। क्रेसेन्स गलातियाल बाके, तीतस ब दलमातियाल बाके। ११ डास लूका

वाज्ज लिज्या। नँ नहुकिन मर्कूसलाई मनी रैद हुनी। नो मिँ डालाई सधैःन्या ओचाहित ल्यो लिज्या। १२तुखिकसलाई एफिससदा परींद डानै। १३नँ नहुक त्रोआसल कार्पसए उक्किमकाव डाख्यानैव क्वा ब रैद याँयो। नधुकिन नलाव पोस्तोको भरी ब यारैयो। नमाधुकिन डा डसरो कागतर भन्या काचाबुल यारैयो।

१४तोम्ता येन दोज्याव अलेक्जेन्दरए डायेन बनै बले-दचाँक्यो। नोलाई गोप्रभुए नो ओबले-ज्याव येननी ज्ञ सजा यान्या ले। १५नो मिँनी नँ ब जोगोइसिद लिनी। नोए आव गेरासथैज्याव पाँलाई वैःन्यात बनै ओर्सा भाःज्याव।

१६उस०कताव डामुद्दाल सुए ज्ञ धुरिद मायाँकेर, प्राइँए ज्ञ रास्नाकेर। परमेस्वरए नोरालाई नो यादोव गल्ती नैद तारायोक्। १७नोराए याख्यानैनादी ब, परमेस्वरए ओपाँ माथैव छुत जातलाव मिँराए डायःनी

घथैरक लिद प्रभुए हो छचाम डालाई धुरिदचाँक्यो। है जैद हो छचामकाव सिन्या मितावनी ब डापुलुस्के। १८ओल प्रभुए ज्ञ डालाई माचाव भरिनी जोगोइद स्वर्गताव ओराज्याल पाथस ज्ञ सकेःन्या ले। नोए उमिन जुक जुक पै खर्क ज्ञ माखेःन्या ज्ञगै मगैव ओताक। आमेन।

जेरो है दान्या पाँर

१९प्रिस्किला, अकिलास सोनो ओनेसिफरसए उक्किमलावरालाई जेरो है यादोयो। २०इरास्तस कोरिन्थल ज्ञ रहिके। त्रोफिमसलाई ते मिलेतसल ओजोरो उहुज्याव डाख्यानैके। २१नँ युँदा ओमाहुद डादा ज्ञ हुन्या जोर दोयो। नँलाई युबुलसए जेरो है दीज्याव। पुदेस, लिनस, क्लौदिया सोनो उपुर्काव दाज्यु भाइराए ब हैज्ञ दीज्यार।

२२प्रभु नँस बास ओदोवक, उयुँ नल्योदा ओय्याल्क।